

四庫全書

集部

欽定四庫全書

秋澗集卷五十六

元 王惲 撰

碑

大元朝列大夫秘書監丞汴梁申氏先德碑銘

并序

大德改號歲之六月越二日癸巳秘書監丞申君敬先
詣太史王某再拜而請曰惟申氏遠有世緒逮我先人

學紹醫傳心存道濟惠及一方雖遭罹世故譜牒墜逸
然自高曾而下班班可考而墓隧無銘神道闕表予小
子大懼先德日遠恐泯昧將無以見於後今粗有纂述
俾昭示子孫以傳不朽者敢請筆於下執事某以不敏
辭者再請益堅乃為論次之謹按申氏世居汴梁曾祖
諱天祿宋徽宗朝以嬰兒科供奉內廷門以金斗為識
當時稱揚醫藝精全者有金斗申氏之目宣和末避地
家秦州社樹坪祖諱良輔早以方伎知名西土祖妣馮

俱壽終葬天水郡顯考府君諱仲康字西叔資稟寬裕
有長者風弱冠值金季流居陝虢間天兵下河南愛申
裕間風土衍沃定謀卜築以甲寅歲東徙今遂為南陽
人府君世其業禁方秘訣夙承指授復為該洽軒岐以
來其書奧妙悉精究其理學既博伎益工在醜不矜其
能活人不期其報過客病困逆旅及貧無資者家置病
寮躬進湯劑糜粥既平復量給路費以遣之遠邇注瞻
以材德兼稱如南陽富民孟氏夫婦府君以伎能起其

死約兼金乘馬謝後恬然不為禮或者不平對府君詬之曰醫以濟物為任若貪圖貨物為心豈天生俞跗保全天闕安羸劣之意哉子無復言客歎服而退初府君東徙聞盧氏守將堯里公賢而下士往依焉草昧際舉族賴保翼一夕宋寇奄至執堯里而去以不屈遇害熊耳嶺府君聞之糾合義勇者數十輩匍匐奔赴求得其屍葬祭迄成禮兵後內外宗姻散失者衆求訪不少置得姨之夫樵翁於申女叔於穰下既孤且寡收養終其

身平生行義類此甚夥今特書其顯著者識者謂府君
為善不近於名尚義不謀其利躬弗受社後世其興乎
以至元己巳歲季夏十有八日考終牖下享年六十有
七配宋氏系出京兆大家資端重未嘗露嬉笑年既笄
歸於我侍舅姑以孝敬聞鞠育諸子極於勤苦後八年
以疾棄養壽七十一祔葬南陽縣東泓河之右薛家里
子男六人曰政嘗監郡酒稅曰整河渠使曰敬即敬先
曰教早世曰敏江陵路醫籍提舉敬先性資醇裕醫學

明敏切脈審用藥精至元六年選充太醫世祖皇帝巡幸兩都北狩東征典司藥石皆侍其行嘗于御前修製湯劑品藻藥性敷奏有條理上顧而喜曰汝身雖小口甚辨博又救治元妃疾獲良愈蒙賜玉鞶帶白金有差至元廿七年由御藥院使陞授朝列大夫選承祕省旌宿勞而從公論也自昔銓衡經制以方伎進者雖有殊勤不轉文武正班敬先讀書勵行有士君子之操故膺是除由是知揚歷清要光顯於親者越茲伊肇敢以府

君之積德起宗敬先之肯構克荷者而銘之銘曰

醫師之良本天恒德挾藝時行心貴專一其視患者罔
有莫適一盡我誠庸表怵惕顯允申公秉茲良直四世
三朝職司疾疾神砭易形靈九起廢藥惠一方心深道
劑羸劣獲安炯我風義活人活國是乃仁術陰積孔多
陽報斯必篤生六子季實良器大我醫門學稱善繼藥
籠流光馨融帝室六脈和平聖躬福謚三十年間祇勤
厥職維皇念功寵數優特謚名仙瀛圖書東壁紆紫腰

金揚休山立匪汝是私良用勸激蒼烟故里光賁丘石
刻我銘章有煌中國獨山鬱茂白波蕩滴山川鴻濛慶
鍾來息子孫振振垂裕罔極

大元故奉議大夫中書兵部郎中韓君墓碑銘
并序

亡友奉議韓君之子冲既禪來謁心焉愴慕有慘而未
安者乃出所狀父行曰孤不天先人早世平時所期者
遠大挾其所有以前而車傾半道念所銜曷祛惟是發

越潛德使表見於後庶存歿少有攸慰公與家府君交
敬而知為詳敢百拜以墓碑為請予以義以分有不能
辭者遂追敘而併銘之君諱天麟字伯昌姓韓氏世為
漁陽上谷人父琇為人長厚儀觀秀偉少應武舉金季
嘗以勞任慶陽府司錄判官母王氏誕昆李四人以次
君為第三母以克肖故尤所鍾愛長業法家學即能鬻
然見頭角於輩行間師以能稱之及為郡法曹獄無大
小皆悉心極慮必盡彼情辭而後已時有楊參軍者詐

冒兵儲公易市戶事覺朝遣官來鞠逮捕者數百家弊積有年不易措手知君幹蠱摘之倚辦楊既窘蹙無可得主者悉取償釋家價從時重君曰不可盜糧者已有主名百姓初不預知今從坐配償已是虛負取價合准出倉時估不然將有破產不勝其弊者上官從之衆得以輕脫至元二年辟充懷孟路從事四年勾補中書左三部令史八年由考工轉御史臺有訴民自關陝來未經有司者議不受君執之曰民豈不知此顧憲臺為重因

而拒之將無所控告罪彼越驀理其寃抑可也事多解
釋以能遷吏禮部員外郎遂建言隨朝掾史已有出職
定例外路吏資亦當與議使至公均被准其事行焉未
幾遷奉訓大夫出為瑞州路別駕俄超授奉議大夫常
德路宣課都提舉先是亡宋稅場濫收奇零等課名類
甚多君稔其擾曰生財有源初不在此使到官者權之
有法所獲多矣於是六色正額外一切蠲去常人稱悅
及比附上額羨果倍徙時方夏官徵民員租追呼鞭扑

急於星火君就府僚與議曰今新陳未接人餬口不給兼積久數多非一朝可辦急則必倍息取貸或易及男女若爾是富益巨室怨歸公家非特於征商有所悞也稍俟秋成徵之未晚用是以停征八番大軍道鼎民被騷甚且沮恢辨有司噤不敢誰何君詣行闔陳說主將喜為約束之市肆賴以帖其乘機應變輸誠濟物多類此政籍甚而課最省臺交章薦入授奉議大夫中書兵部郎中尋被檄檢覈河漕回次濬之劉家渡以暴疾卒實

二十二年乙酉歲八月七日也享年五十有九以是年十一月壬午葬郡西南親仁鄉康公里家塋慶陽府君墓石從溝合也君氣志明辨有幹局善當官好持論往往出人意表其起身立事不資藉昆弟恥踵跡人後氣之所充力所必至卓然自見於用者蓋天性然初韓氏北故後居衛生事微父俾之經商辭焉曰從政固所願也及顯達分有所資悉推讓不一毫取鄉黨義之又排難解紛樂與人為善教子讀書惟恐其不至配孺人梁

氏元帥瑀之長女生子二人曰冲從事郎太平路經歷
曰中御史臺令史繼志治家大克播構曰燕曰梅童皆
庶出四女已適名族者二二未笄銘曰

維天生材畀世作程吏以事主尤資者能理具氣先浩
氣迺形倬彼韓卿氣志蠡閣揚厯臺閣外彪中弼初轉
相府樂夫有行庶單厥心豈惟祥刑彼良而俘是大僂
辱千里求哀情其可恤人以法辭我為理出不以其嫌
竟置彼屈天秩有庸曾問内外由我一言至公均被財

生多源取自有體算及屢簑徒擾而已以正以公所獲
多矣猗嗟韓卿用固強矯年不志充宜若可悼我思古
人云誰盡了圖維不朽君亦少慰子孝而賢仕途方軌
振厲光揚儘濟厥美尚餘幽光樹石表隧謁我銘詩永
勗來裔

平陽程氏先塋碑銘

南陽府倅程君瑞不肖里閭都司趙公倩也故與定交
最早知行已頗詳為人忼朗誠直勁挺尚義而遇事開

談洞見肺腑伸吾志而已而利而害初不計卹由是振觸物論與時齟齬然識者以跡弛不羈許之與君契闊者餘二十載大德改號之春自武定終更來京師僕方忝長翰林尊酒叙舊英邁之氣猶夙昔也既而來請曰瑞始以孤童子入侍隸寶刺謀太子帳下逮事定宗憲宗時朝廷遠駐朔漠屢奉命使襄漢間為互市官歲己未扈世祖皇帝飛渡鄂渚戮力與宋兵戰有功蒙賜銀幣有差及上登極選備膳夫車駕巡幸兩都征伐宴搞

割烹供辦蓋三十年於茲中間以軍國係重越分肆直忤犯權倖致縲紲瀕於不測者屢矣以辭氣侃侃事竟實無他幸不死朝貴多其挺志弗撓奏受忠顯校尉尚食局使又七易寒暑積前後勞官武略將軍出知奉聖州今調同知南陽府事自惟愚忠樸直餘將無有供奉闕廷寵膺民社秩中通忠竭誠圖報之念日深一日奈桑榆景迫年與時馳而追遠返本之懷朝夕是切相嘗僑居即是將起新阡奉安考妣神靈又諗登仕版家先

世塋域例有碑誌况東西南北之人表識之建尤為切務俾子孫繼嗣拜掃考其世系鄉里適追來孝免夫有旌紀寂寥之歎尚吾友惠顧賜之銘則程氏為不朽矣某以契舊且素賞其方概迺為書程氏之先代世為平陽府洪洞縣李村農家曾祖大父俱逸名諱所可知者曾祖生子四人祖第三子也金末以勞効嘗攝行本縣令有子玉房行第八暨弟九郎其後裔尚守遺業玉即瑞之父也府君慷慨重然諾風義矯矯有無與衆共之

貞祐兵亂以武幹保完墟落國朝壬午歲迎降太祖皇
帝從攻鳳翔用愷敵功總西京工匠年三十有九以疾
卒夫人曹氏出扶風宦族生子五人曰實曰瑞曰武略
君曰西京曰當僧曰午兒實之子懷驢職庖人氏次曰
伴驢武略之子曰靈童新阡之兆建於彰德府湯陰縣
之北蘭里實大德戊戌歲某月日也仍為發先世之潛
德懿行與武略之挺志顯親者為之銘俾光賁新壠昭
示來者云其辭曰

維農秉志篤於儉勤服田力穡鍾氣之醇積厚種邁嘉祥自甄何以為驗慶流子孫猗歟程氏植本浚源藹藹風義超越同倫由農而士奮起艱屯克昌再世攀附鳳麟愚忠朴直祇奉嚴宸典司玉食三十餘春名喧禁籞僉曰蓋臣付之民社賞其勞勲貳車五馬阜蓋朱輪大侈寵數顯揚其親有鬱者阡羨里北原光融松檟銘勒貞珉何以訓之孝義忠純昭示不忘垂裕後昆

大元故清和妙道廣化真人玄門掌教大宗師

尹公道行碑銘

并序

道之大原出於自然而隆而污繫夫世運顧人力有不
能致者如甘河之異見於西秦崑崙之氣表於東海自
非素鍾仙分價重一時疇克輔承者哉金貞元正隆間
重陽王尊師始倡全真教法逮長春丘公應期濟度道乃
大行風聲洋溢丕冒海隅至於靜涵道幾動周妙用騁
鶴馭之孤標謁龍庭於萬里絕塵而下稱繼述之善者
我清和尹公其人也師諱志平字太和系橫海華胄大

父而上世以儒業擢進士第歷郡守者凡七人因宦遊東萊遂占籍焉祖公直父行誼皆融德不耀樂施與鄉黨以善人稱師生金大定己丑初母氏夢羽儀擁導若仙官迎謁者寤而生師有瑞光盈庭之異既長資穎悟不凡杳然泰定了知生前事讀書日記千言及冠行遇道士自關右來約師同詣文登醺祭歛失所在但見羽流乘白氎化現空際師懍恍感遇信道愈篤既而潛訪長生師於洛京父母數追止之至鎖閉靜室無幾遁去寓

昌邑之西菴道家者流以禁睡眠謂之消陰魔嘗坐樹
陰下一夕假寐間見長生師厲聲曰向祖師來化汝尚
未悟耶遂揮刃斷其首剖其腹滌易鄙俗去其自滿由
是胃臆洞然靡有所惑二親知志叵奪始聽入道明昌
辛亥參長春公於棲霞遂執弟子禮久之偉其有受道
資盡以玄妙付之曰吾性靈明如鑑不受垢常切瑩拭
以湛吾天自是日有所得又問易原於太古傳錄法於
玉陽鍊習內精聲光外白遠近尊禮戶外之屨滿矣雖

陽州將完顏龍虎素慕真風奉亭圖為菴尋賜額曰玉清觀師佩上清大洞符籙主盟齊東者廿寒暑長春聞之喜曰吾宗教託付今見人矣大元己卯歲太祖聖武皇帝遣便宜劉仲祿起長春於寧海之崑崙山聞師為其上足假道於維以見之遂同宣詔旨先是金宋交聘公堅卧不起至是師請曰道其將行開化度人今其時矣長春為肯首決意北覲選道行純備者十有八人從行師為之冠致帝眷日隆渥玄風遠倡師羽翼弼成

之功為多歲癸未長春還燕主太極宮師雅志閒適退
居縉雲秋陽觀俄徙德興之龍陽長春仙去命公嗣主
玄教即建處順堂於白雲觀奉藏丘公仙蛻壬申四月
太宗鑾輅南還師迎謁於保賜坐論道慰諭者久之翊
日后妃臨幸祝香琳宇錫道經一藏自是四方學者輻
輳堂下歸依參叩于于而來唯恐其後師摘要訣誨之
曰修行之害食睡色三欲為重多食即多睡睡多情欲
所由生人莫不知少能行之者必欲制之先減睡欲日

就月將則清明在躬昏濁之氣自將不生向上達者率自此出人徒知從心為快不悟制得此心有無窮真樂也癸巳冬十月講道經上下篇於義州通仙觀微辭與義大有發明及演七真造道根源殊灑然也聞者為洗心醫巫閭為燕遼鎮山深秀雄鬱必有弘演博大真人往來其間甲午春師往遊焉先是瑞氣蔥鬱封鎖不散者浹旬至是開霽衆以為山靈開先之兆師謝曰吾何德以當之終南祖師煉化地號活死人墓者蕪沒日久

仙樞浮殯朝夕念茲若甃甃在疚己未春關輔略定師
西遊併圖營建又興復佑德雲臺二觀太平宗聖太一
華清四宮以翼祖觀初道出汾晉沁長杜德康請設醮
錄方章啓玄鶴翔空仙侶散壇時雨濟旱丙申秋奉旨
試經雲中度千人為道士俾祈天永命禔福元元師德
望既隆所至風動雲委吏民瞻拜至凶悍無賴輩皆感
化弭服戊戌師壽七秩以教門事付真常李公庚子秋
葬祖師於白雲堂會送者數萬人時久旱雨雪盈尺咸

謂孝誠所致繼董祖菴偈功尋敕額曰十方大重陽萬壽宮初大定七年祖師火其菴東游或惜之曰修人在後吾何亟焉至是殿閣廊廡覆壓千柱終始六甲脗合祖意誠有數存乎秋九月歸五華舊隱己酉賜號清和演道至德真人金冠錦帔付焉辛亥春二月十有一日沐浴易衣冠書頌曰觀化八十三歲澹薄全真活計臨行踏破虛空開放光明無際落筆而逝馨芬滿室三曰不散臨死生際其明了如是師既逝化以皓駒輿觀寧

神五華其日終南祖觀有一道士乘白馬來告清和去
世竟不知所之後訃音至考驗月日知為神遊化現吁
亦異哉師儀觀秀偉風度凝重如瑞人神士不可梯接
然即之春風和氣津津溢眉宇間樂傾所得誨誘不倦
志專利物感應無方如在維陽松柏不種自生其寓仙
谷叢竹一符卦數學徒徧四方觀宇滿天下德博道尊
過化存神之妙不能具載皆出於至誠感發無一毫詐
偽之私宜乎傳嗣道統配列師真上繼長春下授真常

前後無愧可謂清而不耀和不流克肖克荷玄之又玄者矣師平昔所在求詩頌教戒者無虛日肆筆應答辭理可觀有葆光集北遊錄傳於世中統建元誠明張公表師行業於朝追謚清和妙道廣化真人制辭有性天開朗心地坦夷接重陽道統之傳為長春門人之冠宜錫褒章永光仙籍之旨始終昭顯矣法孫陳德定出延安士族師事真人門弟子重陽知宮仇志隆以修進餘力祭醮符籙皆通習之居終南四十餘年潔以修己

耕而後食處巖穴間妖魔屢梗德定以正法神力悉驅
除之由是名著秦雍至元廿七年耀州少尹姚某以聞
蒙世宗文武皇帝召至闕下試驗有徵寵膺玉鼎貂衣
之資元貞二年賜號棲玄致道通真法師三年宣授秦
蜀道教提點踵門來請曰德定自惟託跡草茅何以致
此蓋遠藉先廕思效光揚師祖清和公之返真侍郎趙
楠已表松臺祖菴之復實所權輿今紀行之碑未克昭
建是殆闕如提點溫某等五人已礪樂石幸翰長先生

惠之銘是亦不一書而止之意也予曰有是哉探源報本乃吾儒美事道雖不同其理弗異因次其所具而重之以銘其辭曰

天之蒼蒼一氣清其視下也猶杳冥真元有道本強名俾而全之須人弘甘河感遇世已驚風聲波動東海溟七葉泛滌金蓮英至人挺出開世程崑崙山高古蓬瀛長春再傳何德馨鶴馭九萬搏雲鵬雷雨之動方滿盈為民請命以道寧維持綱紀誰使令十八大弟光啓行

丘仙一笑溘上征清和進脩純粹精傳授道統力主盟
潔己應物謙而誠拱壁駟馬非夸矜事惟無心物取衡
尹家樓觀青雲程開天演化玄元經全之為教乃大明
縱說豎說鍊此形方寸莫遣三害櫻陰魔大嚼風掩燈
嗜慾一肆甚五兵顛木之枿不少萌昏濁之氣何由生
志惟不分神乃凝大賢大哲皆此成用之國治如鮮烹
重陽祖菴功勳興終南太華高稜層玄風浩浩海宇傾
竹宮醮記儲祥禎雨暘下遂萬物情錫民五福世道平

穰穰復正德性寧一朝猗蘭升紫庭仙階霞帔光晶晶
物緣太盛神或憎進退合正聖所稱谷神不死存至靈
未妨委蛻仙山垞瓊樓石室戶不扃神遊八表風泠泠
道傳千古垂日星門人攀慕涕泗零令威留語會有徵
茲惟華表歸來銘

衛州創建紫極宮碑銘

維衛紫極道宮全真師沖虛子房公所創建也初公既
叅丘尊師於海上長春目其氣志非凡殊稱異之居無

幾何命公主馬坊之清真觀迨國朝壬寅歲聊攝趙侯
請師住持郡之玄都宮於是鶴馭東遊道出敝邑汲長
趙實扈林聞師道價重一時以治城崇道里隙地廣六
十舉武縱則倍之奉師為玄覽別館訢然許焉輟其徒
張志洞等結茅以居常闕地得石上刻宋太宰張邦昌
詩什知為吳越錢氏子孫棣華菴故基也師留博僅紀
而西還淇上方屨滿戶外每以居逸教無為慮因集其
徒而告之曰吾大方家雖清虛自然為宗要以應時衍化

為重詎容山林長往歸潔一己乎且吾行天下多矣未
若衛之土中而處會俗美而易化不於焉闡吾教尚何
往然祝延寶供香火焚修之所非大壯麗不足以張皇
教基竦道俗瞻敬之心也乃命門徒孟志玄趙志朴率
衆下商洛之材跋涉艱阻以歲月得木萬計遂建宮殿
七巨楹內設三清大像示至道之原也中起通明觀以
奉玉皇黼宸欽天帝之尊也後復作七真殿五筵敘列
仙品見玄教之傳也下至壇墀神闈齋室庖湑廡庫蔬

圖莫不畢舉師素負巧思志堅而氣充規撫位置意匠
中定不待畫宮於堵而為執用者之法要使堅完鞏固
為數百年物尋師委蛻仙去遺命志朴等曰今大功將
集無以我存歿而作有間勉強前修以卒吾志故志朴
等三十年間焦心勞思攻苦食淡繼述師訓猶一日然
今則繪彩供帳截然一新金光五雲絢爛溢目宏麗倩
深為一方偉觀其工費之廣自力其力初不外假而衆
志勞焉實經始於壬子之春迨至元甲申秋工告迄功


志朴乃件右師之行業與夫興造本末踵門磬折謁余
丈者再余以鄉梓盛蹟且與師有玄談之雅勉為敘次
之師諱志起濰州昌邑人幼業儒既而以異夢有覺遂
入道為人氣貌魁奇操行清峻通古今善篆籀樂與名
士夫遊至於醮祭之獲福雲鶴之顯異所在驚動世之
耳目者為多遺山謂師外朴而內敏質直而尚義似夫
墨名而儒實者蓋確論云宜其事業成就如此至元戊
寅志朴以師德請于朝蒙敕定仙號曰弘直體靜真人

若志朴者於師弟子之禮始終盡矣尚猶以師不覩道緣大成為欲予慰之曰不然昔真人含清真而遊博去博而終稅駕於衛今雖神遊無方其眷戀於此也必矣況其衛間名山勝境固為小有洞天如玄元化現於仙山公和舒嘯於蘇門海蟾留題於白鶴仙蹤靈貺前後接踵見於方志雜出於傳記之說者昭昭矣異時馭風騎氣追陪真仙安知不過故山而留語俯華表而增懷而為孫劉絕塵之舉也邪仍作歌詩詳見師志俾刻諸

樂石雖綿亘千祀庶幾來者有所考焉其辭曰

道家者流本靜清杳冥而無迹與形崇慈尚儉貴不爭
茲乃黃老之常經有時土苴為世程祈禳醮祭由是生
像緣教設雖強名雄樓傑觀爭崢嶸猗嗟先生起營陵
魁偉德業玄門英至人未免安素行河山兩戒盤金庭
方花古礎排巨楹紫雲為蓋青雲城羣仙婉統須皇靈
紫垣落落羅天星先生演化意有徵孰後倦焉先此營
庶用張本道可興陰助政治歌清寧大緣未竟脩上昇

門人攀慕涕雨零歲累月積大有成惜不久視為宗盟
仙宮洞房本不局神遊八表風泠泠來過故國宜少停
紫極夜氣開蓬瀛追攀逸駕非吾能尚想為國儲休禎
風時雨若穀不螟下洗澆俗還淳誠我詩刻石何千齡
要作華表歸來銘



秋澗集卷五十六

欽定四庫全書

集部

秋澗集卷五十七至五十九

詳校官侍讀學士臣沈咸熙

侍讀臣孫球覆勘

總校官降調編修臣倉聖脉

校對官編修臣于鼎

謄錄監生臣汪致基

欽定四庫全書

秋澗集卷五十七

元 王惲 撰

碑

輝州重修王虛觀碑

嘉平道士介煉師范君贇禮幣來謁拜而請曰敝觀在
蘇門顧惟狹陋然歷年久實為自昔名額敢託斯文俾
見興造本末暨師真住持所自用傳不朽廼宿昔所願

見幸憲使惠顧越為光有赫按所具事狀州西郭曰草
市城北走出廣新門百舉武有觀曰玉虛攷其肇基蓋
始於前宋政和間所建大定初仍賜今額為正殿一旁
小殿二中設三清四聖元辰等像函丈後列神閣前敞
下至真官齋壇賓客庖庫之仁咸叙而即宜承平久法
供大行鐘磬齋魚之音隱然聞山水間蔚為共前儲祥
勝地壬癸兵餘日就荒落厥後清虛弘道真人來主治
之月殿星壇稍復於舊尋冷公西歸屬之通妙嚴君顯

奉師訓惟恪乃創水磴稻田褚莊等業雖罄刮衣孟資
贍徒侶大有方便丙申冬嚴既示化真人志慮弘深召
上足通真師梁志一謂曰玉虛道場藐爾於共今繕修
頗完資用苟有第道匪人弘何以行遠矧共山羣彥所
集半為方外眷屬微汝曷克洞玉清之虛靜承文獻之
顧接哉於是唯而來嗣飭治焚修其用克儉已有者守
之日固方來者增而歲新復於百泉西涯買田數畝築
致爽亭貯經史植松竹號嘉惠別館晤言一室罔間儒

墨暇則鼓琴詠歌將以挹蟾房之景氣接鸞鳳之遺音
豈惟與泉石而為伍也雪齋姚公愛其幽勝亦嘗徜徉
其間與師為蒼烟寂寞之友傳曰尚友知人梁之為道
槩可見矣既而師倦勤盡以後事付高弟道燦燦為人
丰姿疏秀氣爽而象恭志繼而本立守護傳繼惟恐墜
越其徒稱之曰能燦姓張氏自童行入道今三十六年
矣嘗觀道家說有玉清玉虛等號亦猶天有九霄神霄
為最高然冲而用之於道體何在是固老子法虛心實

腹守為清修要者蓋心不虛則道無以入物無以容教
無以受而腹無以充矣坐進之功苟疎疑存之理或熄
若道弊者法壽方爾主治院門甚力至於接外務崇本
宗誠能中虛而應物以道腴而充腹者哉正自師祖師
梁庸玉汝於成之旨也若然則其為後來紀綱是者矜
而式之繼為不朽無窮之傳也必矣仍為門人作詩俾
歸來望思以極道真之本其辭曰

蒼蒼共巖桂連蹇兮香焉予懷仙遊遠兮山空日寒悵

疊獻兮宮居粒食思展轉兮遐想仙標玉雪質兮彤車
載花紅一色兮醉鞭星馭金虬蛻兮糝糠塵世宅閭苑
兮嗟嗟堪輿一烘爐兮往古來今爍無餘兮世外無物
須人徒兮剝滌玄覽歸靜虛兮服餌節飲差少瘡兮弱
志強骨壽吾軀兮庶幾真詮師同符兮

大元國大都創建天慶寺碑銘

并序

大雄氏之為教如慈雲慧日覆燾無際惟得其人道乃
大行宮居像設亦從而熾盛之我國家鼎定全燕教隆

內典收精藍勝刹莊嚴實界金碧相望有佛國大秉氣
象惟永泰寺肇基自遼彌陀者泰之別號也太安兵燹
廢撤不存鞠為茂草者五十餘年大元至元壬申有僧
雪堂始來結菴而主之先是師業嗣法猶窟潛天德以
經戒嚴機鋒峻越在雲朔名動京師嘗假息間有以天
慶名所棲而告之者初不諭其故既而有駙馬高唐郡
王聞師名德喜之既覲止即依慈蔭叩真詮師順事指
方日有所覺以至承嘖獲譴非罪而罹苦毒者因師一

言多所縱釋其後王請師住豐之法藏院仍贈貝錦法
衣用著顯異尋以道行上聞有詔所在護持及觀光
大都郡王乃出重幣易是院為師待問駐錫之所與其
徒奉香火修潔精進而已至於建大道場擴充無量功
德蓋遵養而有俟也迨甲申冬皇孫紺蔭刺以師持誦
保釐故欲辟靜室處之官府辭不可翼日出貨泉二千
五百緡泊名驛二仍諭留守段禎詹事丞張九思即所
居庀徒藏事起三大士正殿丈室七巨楹下至門閭庖

湏賓客之所略皆完美始於乙酉之春成於丙戌秋仲
役初作闕地得廢鐘所刻天慶二字考之蓋有遼建號
也事夢既協即為新寺名額於是倚睥像於金光沸潮音
於空際有來諸天普臨雙樹顧諟永泰廢餘復為清涼
法觀矣後三歲奉皇孫奩香禮江浙名刹起造藏經師
冒涉江湖往返萬里存神過化高風所及奔走供養且
有金仙通靈伽藍主護之應吁亦異哉凡得經四藏計
二萬八千餘卷分貯大都之開泰天慶汴洛之惠安法

祥及永豐法藏院仍以法物付之使人無南北通暢玄
風壽聖皇贊寶緒天花雨紛梵唱雷動日開八方之供
者此師之所圖維也宜其經來神衛號應基先雖老栢
重榮神松回指有不是過者遂不千里遠持待制王之
綱事狀以寺碑來請曰山僧空疎無足比數以義以契
尚憲使與顧以銘章貺之始終之願畢矣予以師喜儒
學有器識所交皆藩籬大臣文武豪士緩急於士大夫
周旋不榮悴間解紛振乏要有實效然去來其間殆雲

凝而風休也嘗即寺雅集自鹿庵左山二大老以下至
野齊東林凡一十九人作為文字道其不凡時方之廬
阜蓮社云是亦將因儒釋僧之特達者也宜其行業成
就如此固可以著金石而垂不朽矣師諱普仁字仲山
姓張氏雪堂其道號也世為許昌人父世榮官至豐州
司錄叅軍母夾谷氏師生有禎祥甫毀齒不葷酒齋初
祝髮於壽峯湛老再具戒於竹林雲和尚及叅永泰贊
公一見器異即蒙印可至有機鋒灑落瑩徹永輪頭角

崢嶸光騰星緯之喻贊派出臨濟第而上之師乃慧照
十九代孫也過鎮陽樹碑表行濬源接派以昭其本於
尊祖追遠光又赫焉余嘗論天下之事雖小大有殊畸
酢注措皆有本末就釋氏教論之佛法者本也塔廟者
末也崇其末而遺其本求進於道亦已難矣若師也可
謂持用有方審所先後者哉乃隨喜贊嘆而作偈曰
道之大原出於天物生而靜乃本然扶持有術繫後傳
惟聖日遠湮其言傳攘矯虔紛目前佛來自西來竺乾

慈愍濟度心為先衆生迷惑不知覺沉溺苦海甘流連
人又安得以手濟以法為柁經為船奉持頂戴破黑業
火宅變幻生青蓮龍宮紺殿儘瞻禮具香須滿黃金田
阿師振錫下南海豈為頭角爭昂軒向來四萬八千偈
重與震旦開經筵燕豐汴洛還舊貫佛界珠網搖秋煙
羣昏再曉歸至善如夢日月金沙淵漢人得經纔四十
未若此舉思無邊功圓行滿師不有歸之帝孫祈永年
八方奠枕磐石靖天子萬壽南山堅聖孫神子麗不億

惟城惟藩復惟宣歸來丈室炷香坐但覺鐘鼓清而圓
從此杪擢雙樹底知師澄定草鞋禪

大都路瀋州隆禧觀碑銘

瀋州距今新都東南百里而近本漢泉州地遼為鎮而
亡金縣焉兵後井邑蕭索僅存縣治原隰平行渾流芳
淀映帶左右建元以來春水澄融之際上每事羽獵歲
嘗駐驛民庶覩羽旄之光臨樂遊豫之有賴故生聚市
閭旋踵成趣至元十有三年遂升縣為州從吏民之請

也爰有道館據城西北維亦由是而修崇焉住持圖素
大師劉志實者許之長葛人夙秉淑質自童行入道師
希真劉志永永即長春丘公高弟清虛韓志谷一再傳
也初師永誅茆於都之東郊剗心坐忘凝塵空竈者十
年盤山王棲雲道價高一時歆其精修枉道造謁自號
麻衣老壽八十有四怡然而逝師之在弟子列也侍晨
昏服勤勞人所不堪已自若也積寒暑三紀猶一日然
麻衣見其持守不易皮毛盡而真實在可與有立於是

以通真觀屬院曰玉晨菴者令主張是戊午間誠明真人愛其地佳而氣腴囑之增建以應有開之先始焉荒廛二十餘畝敝屋數間蔽風雨而已師乃以和光同塵朴實感物為方至一鄉欽向願言信施有不期然而然者助益既多功用漸集遂起三清殿繪玄聖於堵所謂上九位者居其中又畫日月星官歲德師聖嶽瀆等神列侍兩傍雲舒霞蔚灝彩絢目殆玄像肇分端倪呈露下至嚴裡有壇靜棲有室凡所需皆具以屋而計者三

十楹歲時清供真仙來臨鐘磬之音隱然空際誠迎祥
之別館一方之榮觀也既落成洞明宗師以今名榜之
及玄逸真人張公嗣教嘉師之勤命書石以昭厥後遂
介鍊師劉文甫來請銘予以謂肯心而構易故而新豈
惟瞻者增敬其因衆成功同延慶壽荅鴻休而畢師志
使來者祝嚴罔逸而隆福降簡穰之本是固所當書者
仍以黃庭七言體歌以系焉其辭曰

道家者流玄默稱抱持其雌無所矜居屋火食相奉承

鳶飛戾天魚在泓疇不若爾休其生爰因像設心自兢
仍用善俗滋良萌澌州維南泉故城王晨有庵無所營
敝廬數間僅幪幝一旦締結三十楹烟光鄰鄰萬瓦青
正自肯構今有成要擴師授昭予誠為國迎祥禱上清
鑒輿歲幸實省耕延芳春水紛霓旌遊豫何翅歌三登
千秋萬歲樂事并道人百拜乞此銘隆禧因之播永馨
雲間難賞聞愾聲安知不有成公興

大元故闕西軍儲大使呂公神道碑銘

盡瘁以事上忠也守志以完節貞也忠貞之澤流潤後
人俾功名奕葉富貴一時而親弗逮者天也故聖人垂
光揚之典可以貫幽明而慰存沒斯亦孝之至義之盡
也若夫負卓越之奇材抱騫騰之逸志起家侍從收功
轉漕臺閣藉風雲之舊門庭絢組綬之榮始以故家遺
俗終以令聞令望振門閥而紹先猷者吾於遂城呂氏
見之矣呂氏世為燕陲鉅族值金季搶攘譜牒墜逸高
曾而下淪不可昭穆公諱嗣慶字昌齡考諱祐仕皇元

由行尚書省掾充諸路人匠府總管妣李氏公幼喜讀書不從羣兒嬉既冠氣貌魁傑學通經史善騎射長於辭令思以奇節偉論表見於世恥齷齪出人後時朝廷遠控北庭詔龍門劉公元帥黃公建行臺於燕柄用頗需決公策時務所急及便益民編者十數事以撼二公果奇其材識以國士許焉既而挈之北覲引見太宗皇帝薦其材應時需堪備供奉上偉其儀觀收隸御帳下碌碌初無所知名居無幾何譯語國體嫻習通曉如素

宦於朝者由是稍得近侍上前公資穎悟應對周旋動
協睿思自爾顧遇頗異出入殿庭寒暑夙暮十載間謹
畏小心未嘗易常度上審其可用命提點尚食局事國
朝大事曰征伐曰蒐狩曰宴饗三者而已雖矢廟謨定
國論亦在於樽俎饜飫之際故典司玉食供億燕犒職
掌視前世為重凡羣臣預燕衍者冠珮服色例一體不
混肴號曰只孫必經賜茲服者方獲預斯宴予以別臣
庶疎近之殊若古命服之制公前後被賜只孫錦服十

餘襲寵數之隆于斯可見歲己未憲宗下詔伐宋車駕
由隴山道漢蜀趣合州之釣魚山大兵既興糧餉為大
計庭議推公宜膺將漕乃降璽書金符充關西興利軍
儲大使公轉致有方給授均一士無飢餒之色民寬飛
輓之勞竟用勤劬致疾以庚申年正月廿四日卒於京
兆府官舍得年四十有三歸葬陞武之西原從祖窳也
公資個儻有大志奉上忠事親孝交友誠進不隱謀退
無私議古今成敗胷中皎然叻縱波濤屢中倫慮材優

器幹事無盤錯脅力方剛經營伊始謂利澤施於人功名昭於時可力致也一旦濟浩浩之長川中流柁折涉漫漫之遠路半道車傾士論于焉為之歎惜夫人王氏系保定大家姿溫恭靖淑公歿之歲纔廿有八舅總匠府君尚在堂二子方髫髻挺志自誓仰事俯育亢起大宗為任遂嚴奉舅璋壽終八秩教育二子至於成人為長子澍娶金名臣追諡通憲先生梁公孫女今以才華英邁練達政務任樞幕經歷為次子淵娶漕僚清苑王

君仲女資秉幹敏隸萼輝映任承仕郎管勾中書承發
司昆李選名朝籍校世官故家不失舊物皆由夫人節
義有方以之扶持者也姻戚鄉閭至爰稱行美取為訓
範女一人適大都郝氏孫五人澍之子道安女惠鸞淵
之子定安李安賜安壽五十一終於大都私居之正寢
越三日祔安玄堂實至元八年十一月十六日也澍既
長樞幕秩中通貴一日與弟淵謀曰今粗有所立猥荷
析薪可不知其所自邪惟我先人大志不遂賁恨下泉

妣貞幹內事克隆遺緒潛德遺淑大懼墜佚有求銘太
史揭石神道賁松檟而垂示不朽融管彤而發越幽光
罔極之恩庶幾昭報廼以不腆之文來請某自惟昔任
裏行與澍婦翁孝可定交時澍方聯姻婭自是交義日
篤于今三紀以契以舊有不得辭者謹掇其義烈之言
振衰風而厲薄俗者銘之其辭曰

惟趙北際保為名城風聲氣習而燕與并越此兩間古
多豪英游談尚氣芥拾功名矯矯呂侯資秉忠貞濟以

學問又多藝能文武備具富之邦經囊雖脫穎已為世
驚一朝麟趾來儀紫庭入侍帷幄即允帝情錦衣分賚
寵數光榮佐商有道奚翅割烹大駕南征如雷如霆食
惟兵本以先啓行曰轉曰漕職焉汝勝民安飛輓師樂
均平心計鞭算以經以營鵬圖海運九萬初程一值不
起其孰使令秦川慘澹有來英靈不隨朝露溘焉涕零
化之閨壺義烈烝烝二子承慶若綬影纓婉婉幕畫執
樞之衡顯揚有例聖經義明郎峯西峙雞距東傾武隧

西原風水攸寧，葬復從祖多祉。是膺元身不歿，永振家聲。古所謂不於其身而在於子孫者，其言有徵，何以驗之？視我刻銘。

大元故昭勇大將軍北京路總管兼本路諸軍
奧魯總管王公神道碑銘

國家當肇造之際，所在豪傑應期效順，畀世侯疊將鎮據一方。父死，子繼；兄沒，弟及。蹈故步而執成規，固自若也。迨夫守成尚文，登庸賢俊，通遷調而革舊習，明治道。

而考殊功所謂閭閻子弟持崇高之體不學無術禁不能有所施為備員而尸祿者多矣論其藉父祖之緒餘卓爾以才傑著聞膺朝廷之選遴藹然稱為良牧伯者誰乎予於孤竹王公見之矣公諱遵字成之世家平州之遷安縣祖諱誥亡金貞祐初任興平軍節度幕官攝府事方大元經略中夏皇太弟國王奉命率兵出榆關循盧龍塞而南雷砰電激所向無前府君審天命之眷臨憫生民之塗炭遂挈二州五縣版圖投獻轅門王嘉

其忠赤首倡大義即聞於太祖聖武皇帝蒙授榮祿大夫
興平路兵馬都總管知興平府事尋錫金虎符加左副
元帥兼安撫使父諱德明字才卿早嗣世爵屬遼右初
定撫養遺黎職修藩翰光奕先業焉公幼穎悟好讀書
年未弱冠入侍藩邸即能練習國體通曉譯語及長資
沉毅負高氣所交皆一時豪傑立志宏達恥碌碌隨人
後歲戊申襲父職仍佩金虎符公自祇承先政夙夜惴
惴惟恐失墜視民事為難不敢忽易遇政令之不便時

俗之未安思而不置憂形於色必咨訪更張俾理順事
得而後已未嘗恣情耽於游宴二十年間猶一日然咸
謂臧孫有後於魯榮祿之澤未艾也辛亥歲入覲憲宗
授本路總管兼萬戶俾專兵民之政殊光寵也世祖皇
帝踐阼分朔南為十路肇建總管府以公奕世材賢授
平灤路總管換佩金虎符且有奉公忘私當副所委之諭
至元乙丑轉官制行授懷遠大將軍知中山府事三年
升昭勇大將軍彰德路總管六年改懷遠大將軍總尹

順德路九年復昭勇大將軍升授太原路總管兼府尹
本路諸軍與魯總管十四年遷北京路總管兼大定府
尹以疾不赴廿一年上章致仕日與故交雅士用琴書
棊槊相娛樂序宿好暢幽情裕如也不幸於至元廿五
年正月廿有七日薨於私第之正寢享年六十有四越
七日葬于遷安縣東石橋西原祖塋之次夫人安氏山
東東西等路軍撫使安公之女和柔貞順光備婦道今
壽登期頤夫人高氏出盧龍處士家資賢明勤於內助

主持家務營辦公喪預有力焉子男五人曰國彥蔚州
採木提舉曰國傑俱先公沒曰國英不仕曰國士早世
曰居仁高所出忠翊校尉湯陰縣尹子女三人長適宋
氏次畢氏嚴氏男孫三人不花永興闕公資雅重智

慮周密奉上忠接下有禮善養名馬識別鷹隼衣冠修
潔車從閒雅有承平豪貴風度人徒知氣習體貌頤養
如是而已不知其當官蒞政持法謹嚴聽斷明察以公
正自處凜然有不可犯之色務要紀綱立號令行其治

相尹并皆監司理所工匠羣不逞之所集公與辯曲直
折姦橫不絲髮貸同僚以相假藉示并容為言曰為之
在我者當如是因公道而致私憾吾不恤也雖時不相
能後竟以事直而心服焉所至興修廟學尊禮師儒崇
禮讓而抑豪強致差賦辦集民安俗阜然悃悞無華不
示表襮持守剛果終始如一故治績渾然不可指摘有
古良吏風當中統至元間聖天子勵精政事以成效責
中書一時宰輔皆極老成選咸謂素無選舉篤責之漸

惟師帥得人上澤可下宣下情可上達庶幾德化之成
太平有象矣故各路總尹慎擇其人至有虛曠歲月不
肯輕以畀受者公之擢拜適丁茲時故四厯名郡兩增
崇資皆出公論之所在卒以職稱聞亦足以伸眉高談
有光故家含笑瞑目無愧先世矣公既葬之十載嗣子
居仁念潛德遺懿恐遂湮沒聞不肖久忝太史屢銘當
代名公貴人乃件右事狀請碑其神道向公移鎮洹上
不肖適退居淇右相衛之交相去不百里迨尹晉陽亦

判平水幕汾晉兩府南北相望故稔知其政績後以迎
迓事南來會過於張少尹昊公館張與公為風雲故契
談其家世行已為詳是則今日論述已有開先之兆矣
敢勉為次第而重之以辭銘曰

遼西惟漢右北平自昔用武地必爭榆闕北控盧龍橫
夾右碣石山海局沉雄氣鬱貫斗精王公孕秀時之英
天兵南下轟雷霆羣情恟恟孰敢嬰惟先奮效忠與貞
玄黃于籩王師迎兩州千里不震驚寒谷陡覺春陽生

風雲儼景同翻騰載世柄總民與兵一朝繩武光嗣承
鯤鵬變化天東溟六合澄清朝日升修文偃武論治經
唐虞黜陟公幽明罷侯置守除因仍德讓凜凜望久凝
漢二千石任可勝政刑相時量重輕劑裁錯節需鋒稜
善良與護奸惡懲大綱既振道自弘興庠育材昭世程
吏畏民愛風化行歷典四郡稱循能趙張才氣恥近名
白頭一節匪變更庶幾無忝先業榮世期福壽方川增
勤勞致疾孰使令生存華屋丘山零嗣惟克肖孚孝誠

銀鈎翠琰勒我銘蔽芾用播甘棠聲遺黎伏讀為愴情
墮淚當與征南并

秋澗集卷五十七

欽定四庫全書

秋澗集卷五十八

元 王惲 撰

碑

渾源劉氏世德碑銘

并序

金源氏崛起海東當天會間方域甫定即設科取士急
於得賢故文風振而人材輩出治具張而紀綱不紊有
國雖餘百年典章文物至比隆唐宋之盛若夫篤志力

學扶藝應選首破天荒魁冠多士父子昆季相繼擢第
為名士夫作良牧守文行端雅門第清峻為金朝第一
流者其惟渾源劉氏乎劉氏出彭城望族五季板蕩播
遷朔土遼末遠祖諱用者居弘州順聖縣之耀武關世
業耕稼生子翰贈承德郎配張氏追封彭城郡太君生
撫字仲謙即今監察御史鄰之高祖也始釋耒耜習進
士業當遼金革命擾攘際學未嘗一日廢天會二年肇
闢科場公以詞賦第一人中選惟遼以科舉為儒學秘

致文體龐雜萎荅視晚唐五代尤為卑下公勵精種學
文辭卓然天成妙絕當世一掃假貸剽竊牽合補綴之
弊其後學者如孟宗獻趙樞張景仁鄭子聃皆取法焉
金國一代詞學精切得人為盛由公有以振而起之也
釋褐右拾遺轉知大城陽曲懷仁三縣擢大理正遷平
陽府判官安東節度副使兩貳大理寺出刺石州累官
中大夫年六十三卒於位翰林學士張景仁碑其神道
公性淳厚見義固執待物誠好誘掖後進三為理官議

獄主恕不屈於權貴故多平反尤長於治民興利除害
若嗜慾然施設有條理簡便可持久所去見思圖形奉
事素愛渾原山水幽勝買田家焉晚號南山翁夫人渾
源雷氏北京轉運使思之女封彭城郡君生四子曰汲
曰渭曰滂早世曰濬汲字伯深穎悟絕人早傳家學與
弟渭同擢天德三年進士屢為州縣有聲累官朝散大
夫應奉翰林文字西京路轉運司都勾判官平生寡合
不羈慕郭林宗黃叔度之為人晚節倦於游宦放浪山

水間以造興讀書為樂稱西崑子述壽藏記叙其行已
甚悉卒年五十八鄆王府文學陳訥銘其墓有西崑集
行於世屏山李之純引其端娶曹氏追封彭城縣君一
子侃字稚川大定十年進士第積資奉直大夫豐王府
文學兼記室叅軍孫一從夔字和卿奉職出身善作詩
曾孫文祖渭字仲清少好學克紹箕裘既登第授承德
郎知秦州隴城寨事調隰州軍事判官終朝列大夫寄
嵐州刺史號闕
老人一子价河水泊酒監曰濬廼鄰

之曾祖博學強記少有聲場屋間既而用廢入仕至安
遠大將軍饒陽令配張氏封彭城縣君生四子似似儼
似似字雅行宣武將軍直定府軍資庫使三子從善字
澤卿彰德府酒監從臯字平卿從契字禮卿武義將軍
克勝軍副都統孫五人曰郊武義將軍曰邛等俱早世
似字稚章孝敬友愛出於天性力學能文稱其家聲四
試于庭不偶用恩賜第授承仕郎華州教授再仕承直
郎主沂水縣簿娶王氏封彭城郡太君壽五十五終於

家遺文雄深簡古有廼祖風嘗訓子孫曰為士當先行
檢如絲之潔將立其身慎無黷汚汝佩吾言則無忝矣
故屏山李純甫表其竈曰善人劉公之墓其為士夫之
紀蓋可見矣一子從益字雲卿自髫髻時已有成人度
擢大安元年進士乙科調鄱陽丞長葛簿陳州防禦判
官皆有治績投機應變措畫出衆意表進提舉南京路
權貨事丁沂水君憂起復拜監察御史君負材尚氣資
之以學欲使事業表大見於世一旦職與志合所言

朝廷紀綱時政利病竟與宰臣辯論得失不屈去職閒居淮陽與諸生講明伊洛學久之選令葉縣至則鋤強剔蠹豪族惡黨噤不敢少肆請免逋租三萬石致流民自歸者口數千大起孔子廟既樹教本集諸生肄習其中風化大行考課為河南最未幾召入翰林為應奉不踰月而卒得年四十又四雷御史淵誌其墓趙翰林秉文勒銘神道皆稱其器識明敏剛直敢言學可以輔政教材足以濟時難貴志以沒士論惜焉葉民至廟而祀

之孔子稱遺直遺愛者豈近是邪蓬門其自號也蓋取
南山翁誠子詩元自蓬蒿出門戶莫教門戶却蒿蓬之
句有文集十卷粹而膽通而不流類其為人內子嚴氏
封彭城縣君子二祁郁祁字京叔少穎異為學能自刻
勵有奇童目弱冠舉進士廷試失意即閉戶讀書務窮
遠大涵濡鍛淬一放意於古文間出古賦雜說數篇李
屏山趙閒閒揚吏部雷御史王滹南諸公見之曰異才
也皆倒屣出迎交口騰譽之及與御史公退居於陳相

與講明六經直探聖賢心學推於躬行踐履自是振落
英華收其真實文章議論粹然一出於正士論咸謂得
斯文命脈之傳壬辰北還鄉里躬耕自給築室榜曰歸
潛歲戊戌詔試儒人先生就試魁西京選山西東路攷
試官後征南行臺拈合公聞其名邀至相下待以賓友
七年而沒享年四十有八翰林學士王磐誌其墓娶史
氏洛陽名族一女適前監察田芝子文冕一男景山終
國史院編修官孫一興同有神川遁士集二十二卷處

言四十三篇歸潛志三卷行於世郁字文季亦名士中
統元年肇建中省辟左右司都事出尹新河召拜監察
御史能文辭工詩翰別號歸愚卒年六十一娶趙氏前
禮部尚書璜之女一子景嵩鄴字伯震一子景巒儼字
稚昂鄰之祖也登承安二年進士第累官至中奉大夫
秘書少監壬辰北渡痛宗國云亡蹈河而死配李氏封
彭城郡夫人三子從禹字虞卿登至大七年辭賦第官
至朝散大夫同州錄判一子曰都從愷字舜卿自幼卓

聲不羣稍長入鄉校擅能賦聲再舉不契就廕補官授
武義將軍登封主簿已而綜覈縣務束湮吏曹人不敢
以少年書生易之國初生聚稍集遴選賢能亟於撫字
辟府君攝領韶州事繼真授宜陽令縣當兵後庶事草
莽高下闕下車廉知其利病休戚斟酌而更易之凡

科取差徭必驗其等第俾均輸焉暇則集俊秀於縣庠
講明禮義美善風俗為政才朞月而頌聲四達終更授
河南府路經歷素精吏事規畫恢恢刃游餘地致六房

無滯務公餘與紫陽楊大西庵楊公九山李子徵薛庸
齋微之觴詠於泉石間中統四年正月廿八日以疾卒
於私居之正寢壽五十有五娶張氏宣德望族貞靜柔
懿自在父母家已稱純孝及歸于我事舅姑恭順飲食
服御非經其手不進也終於至元廿三年十月廿日享
年七十有五葬合祔子男三人廊字君美平江路匠人
提舉至元三十一年十一月以疾歿得年五十有五配
段氏享年四十有九鄣表部場管勾鄰才識警敏練達

時務由省掾授承務郎工部主事次陞承直郎順德路
總管府判官選充監察御史女二長適渾源州王氏次
適應州元帥韓公之孫孫五紹祖江浙省宣使慶祖澱
山巡檢繼祖勝童乞童從稷字賢卿終濟南路儒學教
授三子曰郇曰彬曰郭僕承奉班祗侯遂州酒監一子
從周字文卿劉氏先壠始葬順聖之耀武關南山翁徙
祖塋於渾源縣東北黃嵬鄉御史君以世故流離起先
塋於宛丘神川旅殯洹水歸愚定窆燕山令鄰奉大父

中奉公衣冠及考妣柩安居於河南北邙之原是為渾源劉氏洛陽新阡鄰復欲彰先懿昭孝思圖不朽諗不肖嘗問學於神川先生知其家世頗詳持張陳李趙雷王諸公銘誌求述世德碑以猥列後進年迫衰謝不能發越先賢事業且何敢秉筆於諸名勝之後堅辭者久之鄰復曰金亡士之北渡者百不二三今消磨已盡求接見先輩老於文辭而最知名者莫公若也今弗忠顧則先世之事將於何託不獲已乃採掇諸公緒餘及已

之見聞而知者會歸其極而系之銘銘曰

漢庭射策貢士遺風排斥百氏仲舒是崇唐文三變敗北
無從振起衰荅尊昌黎公兩公傑出莫之比隆考其膚裔
孰繼芳蹤大名難再氣數奇窮金源立國網羅才雄首
魁多士惟南山翁程文妙絕一世師宗當時景仰韓董攸
同子孫克肖家學是攻魏科七決聲華摩空故家文獻決
決大風蓬門卓爾世業克充言直行果節效匪躬支撐
傾頽致時之雍賞志雖歿留名則鴻中奉矯矯職貳大蓬

存亡惟義表我孤忠子孫昌熾為報則豐神川力學洞
聖心冒明理貫道匪文奚工玉佩瓊琚大振辭鋒道家
學之淵流會百川而朝東章甫適越惜不時逢陰相同
氣先志恢洪朱衣白簡乘御史驄何劉氏之多賢試紬
繹其始終種德植善無踰於農立志務學祿在其中忠
義仁恕傳嗣彌縫維人事之克盡見天理之昭融宜澤
流渾水之源青蔚南山之峯北邙之原歸然新宮世故牽
率匪忘祖封是惟金百年文宗之裔過者敬恭

大元故廣威將軍屯田萬戶聶公神道碑銘

皇元以神道戡定區宇翦金取宋保塞一軍號稱雄勝
帥閭堂堂節制於上亦由部曲宣力得其人故也况聶
氏與蔡國張公奮跡布衣義同里閭依乘風雲奕世竭
節者哉公諱禎字正卿世為定興沈陶井里人曾祖洎
大父皆在野不仕父福堅資豪偉善騎射國初張公團
結鄉義柵西山之東流鳩選推為百夫長從定河朔取
汴蔡有殊績終襄縣屯田總管母夫人段氏同里大家

生四子公其長也幼沉驚寡笑言不作羣兒戲及長聰敏好學有謀略慷慨尚氣節年十七嗣襲父職張公察其才武試以攻守之方為問條對灑灑有成箕公愕然不復以向之吳下阿蒙為昧歲丁未率本部分功立杞城毫阯宋人出沒以絕侵軼之患繼攻泗州前後以功受賞有差己未扈世宗皇帝渡江攻鄂渚拔蚤弧先登陷東南城堞帝督戰親覩壯其勇酌酒飲賚以紀其功其年冬命領千兵迎援大帥烏蘭哈達於長沙水陸轉

戰備嘗艱苦竟達漢陽由是陞總轄仍佩銀符中統三年賊壇叛公攝千夫長分圍歷城接戰嘗先諸道兵蒙賜鏐馬俾激士氣壇平遂南城荆山至元六年真授千戶易以金符是年朝廷進軍襄樊公屯守鹿門甚力至元七年行臺命公將番漢馬步三千人取新興寨公曰彼衆而恃險我客而力不一惟當神速掩其不備可成功爾遂一戰而克斬馘不勝計生擒者七十人賞楮幣四千緡至元十二年分隸元帥博囉歡收連海淮安等

州宋守將許安撫者陳艤艤五百艘以俟公帥麾下直
搏之許少却水陸乘之彼軍大壞殺死溺水者十七八
盡獲其戰艦器仗帥府上功旨陞武節將軍繼攻下昭
信泗州階進宣武時孽宋已亡江西湖廣皆內附獨靜
江恃其險遠旅拒不下上以毫軍素精銳戰必勝攻必
取命搃全軍進擊至則賊勢披猖公率猛士深入殊死
鬪首奪西南城堞衆隨之以進城陷捷聞加授顯武將
軍行軍總管桂境雖平大兵後所在草寇竊發充斥山

谷間為良民梗衡山茶陵尤稱搶攘帥稔公威名烜赫
摘諸翼兵千人往平之公窮竟窟穴夷抉根株其脅從
汙染者諭歸田畝井邑安堵軍無私焉所在老幼擁馬
首泣拜曰非公活我吾四縣遺民二十餘萬無噍類矣
其戢禍亂威愛兼濟有古良將風既而蒙古漢軍都帥
張侯以公部曲故家屢立駿功請於朝復備將佐十七年
從張侯入覲進拜明威將軍毫軍副萬戶仍賜錦袍一
襲旌宿勞也俾鎮建康尋移維揚十九年選充江淮都

轉運使二十五年改任廣威將軍大都屯田萬戶一載
間區畫營屯耕稼有法比前政收穫為倍蓰二十六年
更授右翼萬戶田旌閃閃有萬屯曉唱之樂至元廿六
年三月十六日以疾卒於官享年六十有二葬祖塋公
資外嚴毅內廓如也考於事親忠於為國出天秉固然
治軍旅號令嚴明部伍整肅臨陣抗敵挺身決戰略無
顧惜故每戰有功聲名烜赫暇則讀書不輟左氏傳通
鑑戰國策皆通大義古人良法美意奇計偉畫涉獵融

會多見諸行事方經略南服母夫人陳氏尚在堂公廼
心王事不遑暇然遺親之念未嘗置頃刻也一旦心神
內動泚流被面曰豈吾親有故動於彼而應於此耶即
請歸覲比至太夫人喪尚未斂公攀號屢絕痛其終之
無所存活克襄大事鄉里感嘆為平昔孝誠所致夫人
郭氏同縣南王里人溫純恭謹奉事老姑怡順進退不
敢自專年踰四十夫貴子長應對門內事尚以名稱姑
病早暮侍養不少懈倦湯劑必嘗而後進及亡朝夕廬

祭者三周歲宗黨號曰孝婦待妾媵有恩禮略無嫉妬
子一十一人長曰惟義承父爵右翼屯田萬戶次曰惟
謙峽州夷陵尹曰惟明閤門宣贊舍人曰惟孝惟爵未
仕皆郭出也餘幼未名女四人俱適望族元貞建號之
二載冬十一月惟義踵門來請曰自惟無所肖似尚賴
先世遺澤嗣守緒業朝夕惴惴愧無光揚惟是鑽石紀
銘表諸神門圖報萬一稔聞翰學先生學古詞達當代
將相家皆有煩於下執事倘得銘則為不朽矣中建元

余應召中省獲識蔡國父子及提憲河朔郎山雞水之間亦嘗巡歷載惟疇昔雜次其件右而繫之以辭銘曰
丈夫挺志無先外事況乎戰陳聖所慎必不有諸內孰
形於外擴我秉彜克作其氣惟燕南陲聶宗所系奮從
雲雷以功名意侯不封萬志焉罔遂報之後人福祿何
既桓桓廣威克昌再世曉暢戎機蔡國首器發縱指獸
俾展其翼橫戈長江斬鯉蒼海萬竈同心雅歌奏凱長
驅靜江指顧摧敗草砌蟲如肆為民害玉石既分善良

攸賴笳鼓歸來旌旆揚彩酬功進爵大衆天賚高大門
閭鄉閭嘆嘅不知其中大本有在予曾有言質而不礙
篤孝惟移化而忠義公於臣子存沒無愧巨川騰波卽
峯聳翠片石千霄千古光配

大元奉聖州新建永昌觀碑銘

并序

奉聖本秦上谷郡地唐始立新州石晉割賂於遼更今
名曰金陞武定軍節度今雖爲州當兩都往來之衝其
地望尤重於昔雲山環抱川流交貫樹藝茂盛有中土

清淑之美風俗雄碩樂施而好善蓋燕雲習尚氣義而然也據治城東南里許有道觀曰永昌其初祖寂然子張志玄隱微世居河東之孟門縣越自髫髻歆挹真風從平水景鍊師為全真學既長正一法錄亦稱精究貞祐南遷所在俶擾聞長春丘公應聘龍庭師喟然嘆曰天道在北吾將遠游雲朔庶有遇合聿隆道紀至永興之清樂鄉愛其山水幽勝遂結茆而居凝神坐忘志趣叵測謁漿之家咸異之曰彼其中必有所得豈徒然哉

由是風動一方日奉香火羅拜菴前聞有請必恍然開
悟乃相與選勝得獨山中水頭地起建琳宇處師為上
賓榜曰迎仙尊顯之也師佩上清三洞靈章主盟武定
者幾廿載前後化度門人甚衆惟吳張盧三法師得其
要妙而吳在伯仲為最寂然謝世藏觀南化臺吳號通
玄子氣貌魁偉志行誠篤體含妙用動達玄機寂然師
知為受道器常勉之曰汝舉止異常言論卓犖通文辭
知醫藥恐驚翔鶴者終非草野間物寂然既終行緣城

市人或叅叩誦答如流有一鉢千家飯渾身百衲衣心如江月朗情似野雲飛之句其胸懷洞徹如此加以符水療疾隱痛隨愈衆驚異以有道目之達官豪右共來敬禮至有得望其丰采而為幸者闔境尊信法緣契合遂易亡金劉太監別墅為棲真所中有亭崇臺層檐為一境偉觀即改亭為殿奉三清辟容下逮齋厨庫廩以次修舉署曰永昌與迎仙為上下院自是徒衆雲集檀越之家設醮筵而徵冥福求符藥而濟災疾者憧憧而

來曾無虛日鐘磬之聲隱然聞於市肆間永昌琳觀為一方名勝道俗歸依之所矣通玄仙去寧神於永昌之南以後事付上足弟子虞法師師行業修潔和光同塵心存濟度多蒙藥惠補治遺缺而觀之規為始克完具以推擇克玄門道錄虞寂陪葬師側其徒崔志善踵而增飾之崔沒盧法師以道錄來住持焉傳之門人李道素道素姿樸實惟恐過逸前光內則起廢寮舍外則增置田圃朝夕齋戒載勤頌禱望高羽流擢判管内道門

事迺惴惴不遑曰向上師真創心勞神披荆榛掘瓦礫
鋪敦教基吾輩何有坐享其安惟是刻石紀行俾見興
建本末庶垂不朽來丐銘予以道不同不相為謀牢讓
者再請益堅乃酌取大方家見於吾儒之紀載者論次
而銘之後世所謂道家者流蓋古隱逸清潔之士矣巖
居而澗飲草衣而木食節欲以清心修己而應物不為
軒裳所羈不為榮利所怵自放於方之外其高情遠韻
凌煙霞而薄雲月誠有不可企及者自漢以降處士素

隱方士誕誇飛昇煉化之術祭醮禳禁之科皆屬之道
家稽之於古事亦多矣徇末以遺其本凌遲至於宣和
極矣弊極則變於是全真之教興焉淵靜以修己和易
而道行翕然從之實繁有徒其特達者各相啟牖自名
其家若寂然師弟弘行博濟教行北山是也耕田鑿
井自食其力垂慈接物以期善俗不知誕幻之說為何
事敦純樸素有古逸民之遺風焉而復昇授得人顯揚
斯在是可書定安之白雲觀盧法師建永興之觀張法

師建與永昌同一法眷也銘曰

道之大原玄文五千慈儉不爭清靜自然辭固奮激至理
無邊修道為教由是之焉全真為學本乎善淵返純還樸復
太古天究其源委豈忘蹄筌寂然出世私淑其傳雲朔俗
勁聞善易遷坐忘感化孰分後先傾心信嚮克興大緣絕塵
而下復得通玄化行城府重闢法筵一時景仰道履翩翩
香火奔走先業昭宣燕處有室耕鑿有田遺我後人基緒
緜緜門人繼承持守拳拳光揚有例刻銘瑤鐫流光遺烈

億萬斯年

大元故正議大夫浙西道宣慰使行工部尚書

孫公神道碑銘

并序

雲西風土雄碩龍山峻極為之奠焉渾流交貫神川清
淑資其潤焉故士生其間有瓌奇宏傑之稱而劉雷為
之冠焉然山川炳靈奚間今昔况河洛為帝王之里并
汾多攀附之臣儷景風雲依光日月者哉若乃始以才
技有光世緒終則挺輸忠藎作時名卿安榮福壽慶流

後裔者誰乎故宣慰使工部尚書孫公其人也公諱公亮字繼明世家渾源橫山里曾祖諱伯大父諱慶文咸勤力務本不耀其光顯禰諱威為人跣弛不羈早以功名自憊少有巧思肆人業繕治堅密出新意於法度之中方太祖皇帝聖武經略中夏總攬豪傑貯儲戎具為急廼挾所業投獻上賞其能應時需賜名伊克烏蘭錫佩金符充諸路甲匠總管太宗朝從征秦晉惻民被屠戮屢以蒐簡工匠為言賴全活者眾顯妣杜氏主內

務有綱紀嘗辦雪工徒貿逆之誣因之脫死公生漠北
年十許歲總匠君挈之入覲太宗異其風骨曰此兒他
日必大享用蒙賜御饌自是得出入禁闥矣及長資英
明多藝能慷慨有大志練習國典通曉譯語所交皆一
時豪俊衆亦以通材許之庚子歲襲父職佩銀符定宗
朝換金符歲進課精例賜錦幣憲宗特賚貂裘仍勅繼
稱父賜名世祖皇帝在潛邸上命歲輸百鎰有中七矢
而不貫者其堅完如此及南征果獲用中統建元授都

總管上北征駐苦沒敦公出私財置甲冑六十襲以獻

天顏喜甚錫銀笏

闕

忠甲

闕

命領

諸路雜色一

闕

奏

闕

四十妻工之鰥者歲支衣糧

贍濟不給

闕

局廩給自此始又考制度定程式作諸路

恒法公自承嗣選材

闕

下招亡恤弱出私財以代公費

闕

獲而

闕

軍興

闕

蒙賞進秩可謂盡心所事克

闕

以人材抱負論之干將補衲寶鼎枝車未膺所用

有鬱鬱不能自己者至元改元朝廷清明治具畢張公

上疏抗言宜設御史臺肅正紀綱雖不能有符士論偉
之五年憲府肇建特拜監察御史官忠翊校尉上諭
大夫塔齊爾曰他人則未之識如伊克烏蘭朕熟其忠
廉宜與汝共事時官僚極一時之選較夫多識朝廷故
事洞達諸色情狀材氣足以投赴事機威望可以懾服
豪猾在公無以踰此一日職與志慙思明日張膽鯁言
無忌仰答恩遇由是風生白筆氣凌霜簡論列無虛日
時宿衛鷹房憑恃城社頗縱恣在他人弗措手者公優

為之如上都濟時門強奪民物東安州縱馬馳齧食桑
棗甚至砍伐為薪公痛繩之以法至豪強畏避上聞而
以能目之三年考滿憲長奏公自供職無點水私至絕

闕

飲風稜銛利刺督切中裏行無出其右

闕

時選擢正為此爾可再任俾矜式新進者既而察

闕

為外事闕還西川行者冒支楮幣二萬餘定

闕

之義為闕役兵士治第採薪至被虎

闕

五十仍奏治其罪十年夏宣授金符

武德將軍僉山東東西道提刑按察司事至則務實用
顯效張皇憲度故材廉者必薦姦貪者必置于法州郡
惴惴奉約束惟謹褰帷具瞻有風動百城之目東平路
監尹出貴戚簡重自居監司官至郡未嘗相覲聞公來
按部迎謁境上糾治豪縱不法者十數輩曾無一語護
援及去復伸餞禮博德高唐耆老炷香于頂來迓曰自
立憲司未覩稱職如公者我輩獲安田里受賜多矣其
威望顯著吏民畏服可知已十二年陞山北遼東道提

刑按察副使遼東境土曠遠諸王營帳泊諸部種人雜處其間恃勢相交為申嚴法禁革去宿弊豪強斂迹小民氣得少伸分司遼陽親王近侍五人劫居民資用且毆擊之有司不敢究民來訴即械五人徇通衢王諭釋其罪竟杖決之灤水濶而雜砂石自昔無津梁命造荊絡貯碎石為柱以成橋倣此建者百所自爾遼右免病涉苦十三年進階朝列十四年春陞授中順大夫彰德路總管分佩金虎符惟相當南北衝會民物繁夥自昔

為河朔名郡然政務煩重視鄰路為倍蓰公諳練政體
材地有餘當王事全集訟牒交至泛應曲當不失時措
之宜平生遇事有為一旦重膺民社廼究竟利病俾實
惠及民以三事躬請於朝其一比歲霖潦傷稼民多闕
食准免逋稅九千七百石其二諸郡輸逋取道本路徵
發車牛越廣平抵順德往還餘五百里非惟偏倍恐民
力不堪蒙以廣平之磁州代焉其三本路稅粟歲輸大
名秦家渡由唐宋渡河東南行百五十里歲晏寒洑車

人告病聽於唐宋倉輸納前政貸民資五百餘定起新
附軍營舍至是亦給公帑刑民李閏六嘗殺人累問弗
伏干證餘百人移公推密廉其實遂伏辜餘得釋時以
神明稱終更相人懷思至琢石頌焉江浙平上諭中書
省造作事重當選能者主之十六年冬授正議大夫浙
西道宣慰使兼行工部事籍人匠四十二萬立局院七
十餘所每歲定造幣縞弓矢甲冑等物十八年上命左
丞相阿魯罕等征日本給辦艤艫戰具繕製堅完都將

以聞上曰伊克烏蘭豈有誤耶二十年十月來朝大為
上所獎諭賜宴於便殿二十二年授江西等處行工部
尚書上章致仕間居清苑每風憲洎臨民官來質疑必
告以益國便民之方二十四年九月覲上於朝殿上念
世臣之舊問年今幾何居某處子孫幾人奏對畢賜食
俾坐於御榻之西上遣大府卿納里忽問曰飲飫飽未
復賜鹿羹白酒沾醉而出大德元年子拱總尹大同奉
公與夫人張氏還鄉里時公及夫人壽俱高日與親友

相飲宴鄉人榮之改渾源西北山曰畫錦有司亦用名鄉四年正月廿九日以疾薨於私居之正寢享年九十有九遺訓子孫勉力忠孝少不及私二月十四日歸葬於渾源州西劉村先塋之次送葬者數千人哭聲聞數里外蓋平生感懷於人者如此夫人張氏梁氏皆出名家張氏終於四年秋壽八十有四梁氏先公沒子三人拱資誠實材果純孝力學由工部侍郎陞授少中大夫大同路總管兼府尹本路諸軍奧魯總管管內勸農事

撤武畧將軍武備寺丞振忠翊校尉定海縣尹女三長
適安平縣尹趙襄次適李氏劉氏孫男四謙襲世職從
仕卽保定等路軍器人匠提舉次早世諸承直郎利器
庫提點誼進義副尉保定等路軍器人匠提舉孫女三
適趙氏王氏次幼曾孫男一獐頭曾孫女三長適李氏
餘幼公儀觀魁偉器量豐閎美鬚髯容色莊厲嫻習時
體譯語闌翻雜以談謔顧國種貴鄉無以易其論列公
朝集議寮屬處正奉公詞情剴切毫髮不假借善為鉤

距能得小人根株窟穴似夫古之能吏才大夫至於奉
上忠事親孝交友誠雖位望顯赫循循謙讓退然如無
能為者齊家教子敦篤義方循尚禮法又似夫齊魯質
行之士生平疾惡由義激忠其心休休樂善成美出於
天稟粹厚放良臧獲百餘人貸貧民子錢七萬緡宜其
三任風憲位正總尹丕張世守官遷六卿剛直有守允
協士論忠勤無間簡在帝心福壽綿延子孫衆多家門
隆盛雖曰依乘亦由平昔操履感召有以致然也可謂

材德具備勲名兩全哀榮終始者矣嗣子拱以墓碑來
請因憶至元戊辰憲臺初立公與不肖同擢御史引見
世祖皇帝在廣寒殿自爾議事松廳聯鑣馳馬義氣交
孚相得為甚懽後偕官於相迨歲士辰應聘北上復私
覲保塞追叙契闊當時並峨豸冠今所存者獨吾二人
公又奪去僕雖耄忝無一言耶既叙梗槩仍系之銘銘

曰

雲龍奮飛西北天神武載造坤與乾有來羣后旋戎軒

所在戈甲相周旋孫侯挾技善達權賜名訓徒畀任專
函惟杆格貴弗穿函雖多樣公發源犀兕七屬光生烟
上為嗟惜賞世延風雲儷景同翩翩執藝諫請多活全
臧孫有後理固然公其挺生鍾世賢嗣興遺緒心彌丹
鯢化躍出天池淵笏冠執法班朝端憲綱未舉為進言
太微一夕光星躔朱衣白簡相後先忠臣憤激同鷹鷂
秋風博擊無空拳上目剛直由孤騫青齊遼碣海岱連
地廣物衆芽蘖間繡衣風采何翩翩積弊一鏟推邪姦

耻令張趙出吾前煌煌金節臨漳洹霜空霽嚴正春妍
侯伯正位務固繁刺裁錯節驚龍泉吏惟寬慢猛則殘
要本實惠蘇民編上請三事民力殫轉輸省便逋賦蠲
橫斂追給公府錢去思有頌德化宣江浙平一俗巧僂
訓授程課需世官共工汝賢常伯聯工局染院勞次銓
歲時供億物利堅聖皇眷顧稱忠惓一朝上章遽引年
功成身退名節完嗣侯亞卿請外遷作牧鄉郡意所便
錦衣榮養白晝鮮世期福壽方綿綿丘山零落館舍捐

停雲冉冉橫之巔時有白鹿馴其阡神遊悽斷招來篇
自昔豪傑誇雲燕乘時樹立孰敢肩千年鄴劍埋神川
鬱鬱紫氣衝斗邊何以驗之瑤有鐫英聲並與斯銘傳

秋澗集卷五十八